



Sud Bosne i Hercegovine
Суд Босне и Херцеговине

Broj: S1 3 Iž 038387 20 Iž
Sarajevo, 29.10.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Mirsade Džindo, predsjednika vijeća, Srete Crnjaka i Vesne Trifunović, članova vijeća, odlučujući o žalbi Šimić Gorana, Riedstrasse 38, Konstanz, 78467 Njemačka, izjavljenoj protiv odluke Centralne izborne komisije Bosne i Hercegovine, broj: 05-1-07-1-997/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 29.10.2020. godine, donio je

R J E Š E N J E

Žalba se odbacuje kao nedopuštena.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na kojem spisku se ne nalazi žalitelj.

Protiv ove odluke u ime žalitelja, podnesena je žalba putem e mail adrese hrvatikiseljaka2020@gmail.com, u kojoj se navodi da je uvidom u listu prijavljenih glasača koji glasaju van BiH uočeno da se na istoj ne nalazi osoba Šimić Goran, iako je blagovremeno dostavljena prijava i sva neophodna dokumentacija. U žalbi se predlaže da se ista usvoji i imenovanom omogućiti glasanje putem pošte.

Centralna izborna komisija Bosne i Hercegovine je u datom odgovoru na žalbu, predložila da se ista odbaci kao nedopuštena jer je izjavljena od neovlaštenog lica ili da se odbije kao neosnovana.

Uvidom u spis predmeta Sud je utvrdio da je predmetna žalba u ime Šimić Gorana izjavljena sa e-mail adrese hrvatikiseljaka2020@gmail.com, kao i da to nije mail adresa navedena u obrascima prijave za glasanje izvan BiH. Osim toga žalba nije pisana u prvom licu, niti je potpisana od strane Šimić Gorana.

Obzirom na navedeno, predmetna žalba se ne može smatrati kao dozvoljena i izjavljena od ovlaštenog lica.

Kako je po shvatanju apelacionog vijeća žalba izjavljena od neovlaštenog lica, u smislu odredbe člana 180. stav 3. Zakona o parničnom postupku pred Sudom BiH („Službeni glasnik BiH“ broj: 36/04, 84/07 i 58/13), to je istu, analognom primjenom člana 191. stav 1. tačka 1. citiranog zakona, a koji se primjenjuje temeljem odredbe člana 60.a) Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10), valjalo odbaciti kao nedopuštenu.

**PREDSJEDNIK VIJEĆA
S U D I J A**

Mirsada Džindo